

gustav / February 18, 2020 10:38AM

[2.2 \[因果與業\] 打破無明就可斷然解脫嗎？《中阿含業卷三·相應品毘破經第二》](#)

(一) 中阿含業相應品毘破經第二(愁乎過反)(初一日誦)

[0434a14] 我聞如是：

[0434a14] 一時，佛遊釋鞞瘦迦維羅衛，在尼拘類園。

[0434a15] 爾時，尊者大目乾連與比丘眾俱，於中食後有所為故，集坐講堂。是時，尼乾有一弟子，釋種，名曰毘破，中後徜徉至尊者大目乾連所，共相問訊，却坐一面。

[0434a19] 於是，尊者大目乾連問如此事：「於毘破意云何？若有比丘身、口、意護，汝頗見是處，因此生不善漏，令至後世耶？」

[0434a21] 毘破答曰：「大目乾連！若有比丘身、口、意護，我見是處，因此生不善漏令至後世。大目乾連！若有前世行不善行，因此生不善漏令至後世。」

[0434a25] 後時，世尊靜處宴坐，以淨天耳出過於人，聞尊者大目乾連與尼乾弟子釋毘破共論如是。世尊聞已，則於晡時從宴坐起，往詣講堂比丘眾前，敷座而坐。世尊坐已，問曰：「目乾連！向與尼乾弟子釋毘破共論何事？復以何事集坐講堂？」

[0434b02] 尊者大目乾連白曰：「世尊！我今日與比丘眾俱，於中食後有所為故，集坐講堂，此尼乾弟子釋毘破中後徜徉來至我所，共相問訊，却坐一面，我問如是：『於毘破意云何？若有比丘身、口、意護，汝頗見是處，因此生不善漏令至後世耶？』尼乾弟子釋毘破即答我言：『若有比丘身、口、意護，我見是處，因此生不善漏令至後世。大目乾連！若有前世行不善行，因此生不善漏令至後世。』世尊！向與尼乾弟子釋毘破共論如是，以此事故，集坐講堂。」

[0434b13] 於是，世尊語尼乾弟子釋毘破曰：「若我所說是者，汝當言是，若不是者，當言不是，汝有所疑，便可問我：『沙門瞿曇！此有何事，此有何義？』隨我所說，汝若能受者，我可與汝共論此事。」

[0434b17] 毘破答曰：「沙門瞿曇！若所說是，我當言是，若不是者，當言不是，我若有疑，當問瞿曇：『瞿曇！此有何事，此有何義？』隨沙門瞿曇所說，我則受持，沙門瞿曇但當與我共論此事。」

[0434b21] 世尊問曰：「於毘破意云何？若有比丘生不善身行、漏、煩熱、憂感，彼於後時不善身行滅，不更造新業，棄捨故業，即於現世便得究竟而無煩熱，常住不變，謂聖慧所見、聖慧所知也。身生不善、口行不善、意行不善無明行、漏、煩熱、憂感，彼於後時不善無明行滅，不更造新業，棄捨故業，即於現世便得究竟而無煩熱，常住不變，謂聖慧所見、聖慧所知。云何，毘破！如是比丘身、口、意護，汝頗見是處，因此生不善漏令至後世耶？」

[0434c02] 毘破答曰：「瞿曇！若有比丘如是身、口、意護，我不見是處，因此生不善漏令至後世。」

[0434c04] 世尊歎曰：「善哉！毘破！云何，毘破！若有比丘無明已盡，明已生，彼無明已盡，明已生，生後身覺便知生後身覺，生後命覺便知生後命覺，身壞命終，壽已畢訖，即於現世一切所覺便盡止息，當知至竟冷。猶如毘破，因樹有影，若使有人持利斧來斫彼樹根，段段斬截，破為十分，或為百分，火燒成灰，或大風吹，或著水中。於毘破意云何？影因樹有，彼影從是已絕其因，滅不生耶？」

[0434c13] 毘破答曰：「如是。瞿曇！」

[0434c14] 「毘破！當知比丘亦復如是，無明已盡，明已生，彼無明已盡，明已生，生後身覺便知生後身覺，生後命覺便知生後命覺，身壞命終，壽已畢訖，即於現世一切所覺便盡止息，當知至竟冷。毘破！比丘如是正心解脫，便得六善住處，云何為六？毘破！比丘眼見色，不喜不憂，捨求無為，正念正智，毘破！比丘如是正心解脫，是謂得第一善住處。如是，耳、鼻、舌、身、意知法，不喜不憂，捨求無為，正念正智，毘破！比丘如是正心解脫，是謂得第六善住處，毘破！比丘如是正心解脫，得此六善住處。」

[0434c25] 毘破白曰：「如是，瞿曇！多聞聖弟子如是正心解脫，得六善住處。云何為六？瞿曇！多聞聖弟子眼見色，不喜不憂，捨求無為，正念正智，瞿曇！多聞聖弟子如是正心解脫，是謂得第一善住處。如是，耳、鼻、舌、身、

意知法，不喜不憂，捨求無為，正念正智。如是，瞿曇！多聞聖弟子如是正心解脫，是謂得第六善住處。如是，瞿曇！多聞聖弟子如是正心解脫，得此六善住處。」

[0435a04] 於是，毘婆沙白世尊曰：「瞿曇！我已知，善逝，我已解。瞿曇猶明目人，覆者仰之，覆者發之，迷者示道，暗中施明，若有眼者便見於色；沙門瞿曇亦復如是，為我無量方便說法現義，隨其諸道。世尊！我今自歸於佛、法及比丘眾，唯願世尊受我為優婆塞，從今日始，終身自歸，乃至命盡。」

[0435a11] 「世尊！猶如有人養不良馬，望得其利，徒自疲勞而不獲利。世尊！我亦如是，彼愚癡尼乾不善曉了，不能解知，不識良田而不自審，長夜奉敬供養禮事，望得其利，唐苦無益。世尊！我今再自歸佛、法及比丘眾，唯願世尊受我為優婆塞，從今日始，終身自歸，乃至命盡。」

[0435a17] 「世尊！我本無知，於愚癡尼乾有信有敬，從今日斷。所以者何？欺誑我故。世尊！我今三自歸佛、法及比丘眾，唯願世尊受我為優婆塞，從今日始，終身自歸，乃至命盡。」

[0435a21] 佛說如是。釋毘婆沙及諸比丘聞佛所說，歡喜奉行。

[0435a23] 毘婆沙經第二竟(一千五百二字)

引自：

中華電子佛典學會CBETA《漢文大藏經》，標點符號分段照引

http://tripitaka.cbeta.org/T01n0026_003

參考資料：

莊春江標點今譯《中阿含經南北傳對讀》

<http://agama.buddhason.org/MA/MA012.htm>

莊春江《阿含經故事選》

<http://agama.buddhason.org/book/as/as070.htm>

Edited 2 time(s). Last edit at 02/18/2020 10:43AM by gustav.
